

東華續錄

光緒八十三

臣朱壽朋敬編

臣潘鴻鼎恭校

五月丁巳朔准河南巡撫邊寶泉開缺調理○戊午夏至大祀地於方澤上親詣行禮○以倪文

蔚爲河南巡撫○恭壽奏駐防之要練兵爲先治兵之法因時制宜查杭州滿營自光緒四年添練洋鎗

隊一營先後奏准共兵四百名當經調署福州將軍古尼音布奏派統帶協領長志全營翼長協領柏梁

管帶督同營總柏恆鳳魁哲爾精額並調撥綠營教習來營教練現經督飭該統領等逐日認真操練今

將一切陣式操練精熟可期實用惟兵數過單恐遇防剿不敷調遣設能多練一兵似可多得一兵之用

奴才再四思維悉心籌畫請將所練之兵酌定更番調練之法卽以原領之款添練新兵擬八旗內再選

精壯者四百名編入歸伍新陳合成八百之數卽照現定章程半陳半新輪流操練每月仍以四百名入

操所有月支津貼發給現月入操之兵不入操者仍撥各項值班如此辦理不獨兵旣多練款無加增且

陳練之兵不致日久生疲則新練之兵亦可日漸精熟實與差操均有裨益至添練之兵應需洋鎗業由

奴才咨商浙江撫臣於善後支應局舊存洋鎗撥用今旣添練新兵操務較前繁重自應派員幫同辦理

查有管帶格林礮營總記名協領花翎正藍旗左領柏恆差操勤慎管轄嚴明堪以派充幫辦全營翼長事務仍令兼管格林礮隊以專責成至於所擬節餉練兵章程及一切更番訓練之法奴才勉竭愚誠惟有督飭統帶各官實力講求勤加訓練務使一律精熟咸成勁旅報聞○己未以內閣學士洪鈞充出使俄國德國兼駐奧國和國欽差大臣大理寺卿劉瑞芬充出使英國法國兼義國比國欽差大臣直隸候補道李興銳賞加二品頂戴充出使日本國大臣○楊昌濬奏閩省前辦海防捐輸遲羅駐新嘉坡領事陳金鍾勸辦外埠閩粵各籍富商捐輸案內閩籍道員職銜吳進卿慷慨捐輸除照章核給正二品封典並請 賞戴花翎外尚有溢捐銀九百六十四兩零據稱願作報効不敢仰邀獎敘由陳金鍾代請另給匾額等情伏查吳進卿係福建漳州府海澄縣人久居外島乃能眷念梓鄉捐輸助餉洵屬深知大義所有溢捐未獎之銀將及千兩雖據稱不敢仰邀議敘究未便沒其向義之忱自應俯如所請由臣撰給匾額以示優異下所司知之○庚申岑毓英奏雲南僻處西南界連西藏緬甸越南南掌諸國近邊荒服歷代均以土司世守其地表華夷之限制爲中國之屏蔽雖數百年來相沿不改而弱肉強食互相侵奪之禍幾於無時無之邊患多由於此前因裸黑山頭目張秉權侵佔猛猛土巡檢所屬圍控地方三十餘寨彼時臣正值帶兵出關經前撫臣張凱嵩會奏派員前往查辦臣隨卽訪知裸黑山地方延袤一千數

百里外連緬甸北境高山等處內與緬威寧遠思茅各廳屬犬牙相錯林深箐密烟瘴尤甚張秉樞所踞裸黑山上段大山之地縱橫七百餘里其裸黑山下段之地現爲石朝鳳石朝龍李芝隆等分踞互相雄長因擬用夷制夷之法將下段各裸目先行招撫以免張秉樞煽結爲患上年八月二十一日曾將派委知府王德誥參將尉遲東曉前往裸黑山招撫下段各裸目情形奏明在案並聲明招撫就緒可否給予土職再行請旨辦理茲據該委員等招撫就緒回省銷差並將裸黑山下段裸目李芝隆石朝鳳石朝龍之孫石光三誠心歸順具結認糧各情稟由署雲南布政使史念祖會同善後局司道詳請具奏前來臣查裸黑山僻處遐荒向歸猛連猛猛管轄自軍興後該裸目等仇殺相尋概難繩以法律今李芝隆等首先向化一經委員招撫遂卽相率歸誠與張秉樞之始終怙惡者迥殊現查張秉樞已於上年八月被雷擊死其次子張登發相繼爲惡仍屢次攻佔猛猛土巡檢地方邊氓受害者不下數千家若不認真剿辦難免不日漸滋蔓勾結緬越強敵爲患現值炎夏瘴癘正發難於用兵擬先行派兵防剿以守爲戰一俟秋高瘴退卽選派得力鎮將酌帶兵勇分路進剿並諭令李芝隆石朝鳳石光玉各率土兵隨營効力得旨如所請行○壬戌中法續議界務專約成其文曰按照光緒十一年四月二十七日由大清國大皇帝及大法民主國大總理釐天德各派官員親赴中國與北圻交界處所會同勘定界限業經

兩國大臣親自履勘竣事現經 大清國 大皇帝特派管理總理各國事務衙門多羅慶郡王總理各

國事務衙門大臣工部左侍郎孫大法民主國大物理璽天德特派全權大臣下議院國會參議會任吏部尚書駐劄中國京都總理本國事務恭將該處界務會商定議永遠遵守所有商定辦法開列如左

第一款 一將兩國勘界大臣之節略並所繪界圖均親自畫押者現在互相校閱各無異議 第二款

一其間有兩國勘界大臣意見不同之處及光緒十一年四月二十七日和約第三款末節所載改正之處照以下所開三條辦理 第三款 一廣東界務現經兩國勘界大臣勘定邊界之外芒街以東及

東北一帶所有商論未定之處均歸中國管轄至於海中各島照兩國勘界大臣所畫紅線向南接畫此線正過茶古社東邊山頭卽以該線爲界該線以東海中各島歸中國該線以西海中九頭山及各小島歸越南若有中國人民犯法逃往九頭等山按照光緒十二年三月二十二日和約第十七款由法國地方官訪查嚴拿交出 第四款 一滇越邊界第二段從小賭咒河南岸狗頭寨照圖上甲字起由狗頭

寨自西直抵東計五十餘里北邊聚義社卽聚美社聚美社美肥社卽義肥社歸中國南邊有朋社歸越南至圖上乙字處從乙字至丙字亦由西抵東中越邊界路經二河其二河並歸一河入大賭咒河又名黑河從丙字往東南約十五里至丁字以北之南丹地方全歸中國從丁字往東北至猛峒下村卽圖上

戊字處按圖上所畫從丁字至戊字界線其南之南燈河漫美猛峒上村猛峒山猛峒中村猛峒下村全歸越南其北全歸中國從猛峒下村戊字起經清水河入大河之處卽圖上己字以河中爲界從己字至庚字以大河中爲界河西之船頭歸中國河東之偏馬寨歸越南從庚字往北至辛字經老隘坎至白石崖中越各有一半白石崖老隘坎以東歸越南以西歸中國由辛字往北順偏保卡北保中間入大河之小河東岸直往北至高馬白卽圖上壬字卽接第三段勘界大臣所畫定之處 第五款 一滇越邊界

第五段自龍膊寨雲南越南邊界經龍膊河到清水河入龍膊河之處爲止此處圖上甲字由此界自東北往西南至綿水灣入賽江河之處爲止卽圖上乙字按現畫界則清水河綿水灣河歸中國自乙字由東直抵西過藤條江在大樹腳以南爲止此段界線以南歸越南以北歸中國卽圖上丙字自丙字處起到金子河入藤條江之處爲止以河中爲界卽圖上丁字從丁字起經金子河計程三十餘里又由東至西抵圖上戊字處此界過在猛蚌渡以東入黑江之小河卽圖上己字從戊字至己字以河中爲界從己字往西以黑江之河中爲界照兩國勘界大臣畫定界圖並照以上所畫界線由 大清國地方官及大法民主國欽派駐越大臣遴派官員前往會同辦理安設界牌事宜現畫定界圖二分每分三張乃兩國欽差大臣畫押用印者圖上新界以紅線爲界雲南界圖並註有法國阿等字中國甲等字以便易於

識認○中法續議商務專約成其文曰 大清國 大皇帝大法民主國大總理璽天德彼此欲令兩國通商來往倍加興盛又欲將光緒十二年三月二十二日天津所定和約彼此保固切實施行酌定續約商改數欸爲此兩國特派全權大臣會同辦理 大清國 大皇帝特派管理總理各國事務衙門多羅慶郡王總理各國事務衙門大臣工部左侍郎孫大法民主國大總理璽天德特派全權大臣下議院國會參議會任吏部尙書駐劄中國京都總理本國事務恭各將所奉全權文憑互相校閱妥協立定條約如左 第一款 除今約所改之欸外光緒十二年三月二十二日在天津所定之和約換約後仍卽逐欸切實施行 第二款 按照光緒十二年三月二十二日所定和約第一款兩國指定通商處所廣西則開龍州雲南則開蒙自緣因蠻耗係保勝至蒙自水道必由之處所以中國允開該處通商與龍州蒙自無異又允法國任派在蒙自法國領事官屬下一員在蠻耗駐紮 第三款 現因中國北圻來往商務必須設法作速振興所有光緒十二年三月二十二日和約第六七欸內所訂稅則今暫行改定凡由北圻入中國滇粵通商處所之洋貨卽按照中國通商海關稅減十分之三收納正稅其出口至北圻之中國土貨卽按照中國通商海關稅則減十分之四收納正稅 第四欸 中國土貨按照光緒十二年三月二十二日和約十一欸第一節完納進口稅後過北圻到越南海口者除中國之外如係前往他國

則出口之時應照法越稅則納出口之稅 第五款 中國允准中國土藥由陸路邊界出口入北圻此土藥應完納出口正稅銀貳拾兩一擔法國人及法國保護之人只能在龍州蒙自蠻耗三處可以購買此項土藥中國商人所應納內地釐金等費亦不過貳拾兩一擔之數中國商人由內地運土藥者將此土藥交與所買之人時卽與收釐憑單而所買土藥之人完納出口稅時將憑單到關呈驗繳銷再此項土藥不許由陸路邊界通商海口再入中國作爲復進口之物 第六款 除兵船及運載兵丁軍械之船外所有法國及北圻船隻從諒山至高平復由高平至諒山經過龍州至高平並高平至龍州之河此項船隻每次路過卽每噸納鈔銀五分惟船內所載貨物一概免稅運入中國貨物可用此二河其貨物並可用旱路及諒山至龍州之官道俟中國在邊界設關之時此項經過陸路之貨物在龍州必須完稅後方准銷售 第七款 日後若中國因中國南境西南境之事與最優待之友國立定通商交涉之和約條款章程等類所有無論何等益處及所有通商利益施於該友國此等約一施行則法國無庸再議無不一體照辦 第八款 右各條經會同商定後 大清國 欽派王大臣及大法民主國欽派大臣將此約條款原文譯出漢字畫押用印二分 第九款 此次續約並光緒十二年三月二十二日通商和約經兩國 欽差王大臣互換後此續約與該通商和約並載一體施行 第十款 此約現由大

清國 大皇帝批准及大法民主國大伯理璽天德批准後卽在中國京城互換○岑毓英奏雲南裸黑頭目張秉權勾結蠻眾攻據猛猛土巡檢所屬圍控地方擄掠燒殺勢甚披猖業經臣與前撫臣張凱嵩將剿辦情形先後奏明在案詎意裸匪狡譎異常見官軍進攻則深匿不出詭詞乞撫而實則仍勾黨與恃險負隅比因西南防務喫緊姑示羈縻迨張秉權於上年八月間被雷擊死後其子張登發尤爲兇惡復屢次攻占猛猛邊地擾害不堪疊據順甯府及緬甯廳文武地方官先後稟報並據應募猛猛土官罕華封稟請發兵剿辦復經臣添派參將侯應賢管帶順甯協操兵並飭參將禹光廷等挑招順甯雲州緬甯土勇五營游擊李春陽募景東廳土勇兩營千總刀煥彩募鎮沅廳土勇兩營參將尉遲東曉募威遠廳屬猛烘猛班猛戛各地方土勇七百名分紮要隘相機進剿以期殲除裸匪俾安邊界報聞○張之洞奏廣東香澳六廠由總稅務司赫德代征有損無益請飭停止得 旨該衙門議奏○癸亥諭軍機大臣等中法續訂界務商務條約已派王大臣與法使畫押所有照繪欽州界圖及照錄條約各件卽日由總理衙門發交委員馬復賁齋回其設立界牌事宜照約由地方會同駐越法員辦理鄧承修著卽馳驛回京○唐炯奏礦務事體繁重兼以庫帑出納亟須羣策羣力始免貽誤查有海防先候選知縣濮文曦深通化學諳習開廠辦礦事宜該員現在京候選四川機器局委員巡檢商啟文精於製造機器該員曾經

已故督臣丁寶楨奏保四川越巂同知鄧林明晰鈎稽諳練鼓鑄該員籍隸江西現已告病開缺回籍仰懇 天恩飭下吏部及四川江西督撫臣飭令該員等迅速來滇聽臣差遣用資臂助 上諭唐炯奏請調員辦理礦務等語候選知縣濮文曦四川機器局委員巡檢高啟文前四川越巂廳同知鄧林著吏部及四川總督江西巡撫飭令該員迅赴雲南交唐炯差遣委用○裕祿等奏湖北設局鼓鑄業經臣等酌議章程奏明開辦在案茲據寶武局司道詳稱該局所司銅鉛必須循環辦運從前購自滇黔向無應完稅項現因內地來路短少改購外洋銅鉛委員由滬運鄂核計價值運腳成本已屬不輕若再照商運完稅勢必耗本愈多補注愈難近時戶部採購東洋銅斤經過各關並未收稅外省購辦鼓鑄銅鉛事同一律自應詳請奏明立案免完關稅以輕成本以資周轉等情前來臣等伏查銅鉛為鼓鑄要需現用購運成本係動自帑項且事關規復圖法舊制亦與別項採辦不同相應奏明請 旨飭部立案將鄂省採辦鼓鑄銅鉛由滬運鄂經過江海關准予查驗放行免完關稅仍由臣等按批發給護照注明斤數並咨請南洋大臣行知關道認真稽查如於照外有夾帶走私情弊卽由該關道照章查拿罰辦以昭核實得旨如所請行○甲子調明魁為乍浦副都統以連慶為正白旗蒙古副都統○乙丑以烏拉布署鑲白

旗蒙古副都統○諭戴遷等奏請飭追欠款一摺據稱承修各項要工前經奏撥直隸藩庫銀二萬兩僅

領到銀一萬兩現在工未修竣待欸甚殷懇飭籌撥等語著李鴻章飭令藩司迅將欠發銀一萬兩如數撥給以應要需另片奏前撥直隸旗租項下銀一萬兩尙欠解五千兩請旨飭催等語並著李鴻章飭司籌撥○丙寅諭軍機大臣等中法續訂界務商務條約已令總理各國事務衙門王大臣與法使恭恩當畫押所有條約照會各件不日由總理衙門咨行該督撫查照辦理滇省界務周德潤與法使狄隆會勘時意見未合歸入請示者兩段此次定議經總理衙門與周德潤按圖面商據稱猛梭猛賴一段荒遠瘴癘棄之不足惜岑毓英所見相同至我所必爭者南丹山以北馬白關以南其中山川險峻田疇沃美如能劃歸中國既可固我疆圉亦可兼收地利當經總理各國事務王大臣與法使恭恩當反覆辨論將猛梭猛賴一段准歸越界其南丹山以北西至狗頭寨東至清水河一帶地方均歸中國管轄約計收回各地段不下方四百餘里此事煞費唇舌始克就我範圍所有各該處界址應照約按圖由地方官會同駐越之法員申劃清楚設立界牌其餘善後各事宜屯田應如何興辦防兵應如何分戍該督撫務當詳細籌商次第經理界務既定卽須接辦商務岑毓英前奏布置邊防摺內有蒙自爲通商要津之語現准蒙自設立領事開辦通商正相脗合至蠻耗係保勝至蒙自水道必由之路准其分設領事屬員與中國分設之稅司互相稽察現經議定蒙自設立領事官時必於數月之前先期照會以便駐紮關道安設稅司

粵省以龍州開關請設太平歸順道一員駐紮該處雲南事同一律著該督撫趁此尙未開辦之時悉心布置奏明辦理至滇之土藥釐金向來徵收甚微現定每百斤稅釐各收銀二十兩必須完過釐銀後方准法商完稅接買將來於課項亦有裨益總之界務商務總理各國事務王大臣所定條約挈其大綱此外節目周詳施行盡利全在該督撫隨時規畫用人得當一切慎之於始免致別生枝節是爲至要將此由五百里各諭令知之○諭御史慶祥奏八旗置買房地納稅未能劃一請量爲變通一摺著戶部議奏○譚鍾麟等奏西甯所屬番族黃河以北惟剛咱族爲最大黃河以南則上下魯倉族爲最大其餘種類不一如阿粗平等族本係野番以搶刦爲生附近熟番屢次受其禍害此次戕害弁兵勢不能不嚴切懲辦特以前阻雪山地僻而深行軍運糧道路險絕人馬皆仄足而行瘴癘薰蒸入秋尤甚且慮該匪西竄川番界內則越境剿辦恐無了期臣鍾麟當飭方鼎錄鄭連捷等相機剿撫慎重前進並傳諭魯倉千戶魯本科於阿粗平等番匪經過魯倉責成該千戶截阻毋令西竄魯本科深明大義與百戶方郎率馬隊數百名沿途阻截故官軍一戰而匪就戮餘衆安撫魯本科不爲無功臣鍾麟與臣福裕咨商撥派魯本科爲總管河南番族千戶阿粗乎四族現設百戶四名由貴德廳給予執照俟三年後管束嚴密再由青海衙門換給百戶執照歸完受寺千戶管束而統轄於魯本科以資鈐制每年酌量賞給魯本科倉斗青

稞十八石百戶方郎每年賞給倉斗青稞八石完受寺千戶阿剛每年賞給倉斗青稞十石均由貴德所存番屯糧內支給俾令隨時約束番族以專責成其迭禪寺噶爾且錫勒圖呼圖克圖及完受寺番僧恰爾蓋二名素爲番族信服此次辦理收撫甚爲得力應如何獎勵之處請 旨飭下理藩院從優議敘庶四族聽其約束不致滋事亦綏靖邊圉之道也得 旨如所請行○譚鍾麟等奏查去年六月拿辦貴德阿粗平等四族野番殲斃首犯餘衆就撫各營將士實屬異常出力經臣鍾麟會同前西甯辦事大臣李慎奏乞 恩施擇尤爲出力者每營酌保數員欽奉 上諭覽奏已悉仍著將善後事宜辦理妥善等因欽此欽遵分別查照在案臣福裕履任後據各營開送酌保員弁清單前來因到任未久咨商臣鍾麟以各營所保太多將原冊發還核減每營祇准保獎數員旋由營務處方鼎錄等彙齊清單履歷臣等覆核尙無冒濫查此次番匪搶掠斃兵刦犯戕官屢經諭令獻出首惡抗不遵照經臣鍾麟派李良穆率沈福田馬安良等大營遏其東竄崔偉王振德劉可舜馬步三營扼其西竄番果洛克之路鄭連拔率馬步四營與貴德同知張大鏞帶土勇數百名由中路進攻委西甯道方鼎錄總理營務就近調度並派員分司轉運以濟三路軍食該匪以雪山爲巢穴初踞高紅崖恃險抗拒鄭連拔等率衆掩擊退踞龍王池經李良穆派隊斷其雪山小道該匪西竄忙拉水川其地巉崖巨壑林深箐密意欲誘我軍深入斷絕歸路鄭

連拔等飭營倉千戶魯本科持諭前往開導令其縛獻首犯卽免剿辦乃該匪憑險負固我軍猝至開放鎗礮崔偉等分路進剿陣斬首逆悍匪數千名帶傷者數十名餘衆越嶺奔逃我軍亦陣亡參將一員兵勇六名帶傷數十名此六月二十二日攻剿獲勝情形也該四族番匪經此痛剿畏罪投誠懇求受寺番僧十戶等率領頭目投營乞撫自矢永不爲匪當由鄭連拔王振德張大鏞等散給牛羊馬匹准其插帳游牧並令四族各舉番目一人爲百戶給以執照俾資約束自去秋以來不獨該四族安居樂業卽他番亦不聞有搶劫之案黃河以南蒙古各處一律安靜所有在事出力之西甯道方鼎錄總辦營務調度有方擬請遇有應升缺出請 旨簡放記名提督題奏總兵署西甯鎮總兵鄭連拔擬請 賞加頭品頂戴署河南鎮總兵提督李良穆擬請交部從優議敘提督崔偉擬請 賞加頭品頂戴總兵沈福田擬請以提督記名 簡放總兵銜留陝甘儘先補用副將王振德擬請以總兵儘先補用儘先升用知府甘肅貴德同知張大鏞擬請以知府儘先卽補並 賞加鹽運使銜其餘出力員弁另繕清單仰懇 天恩飭部照請獎敘以示鼓勵下部議奏○己巳諭剛毅奏虧短交代各員分別參追一摺暫行革職之前山西神池縣知縣孫國恩已革和順縣知縣夏肇庸已故汾陽縣知縣朱安國前在各任內虧短正雜各款銀兩爲數甚鉅參追後逾限未繳實屬玩延孫國恩朱安國均著卽行革職孫國恩與夏肇庸一併監追並將

該三員寓所資財先行查抄一面提集經手書差人等嚴訊是侵是挪分別辦理並著順天府府尹浙江巡撫將各該員原籍家產一併查抄備抵興縣知縣王毓雲前因虧欠米穀業經革職查抄現據奏稱該員虧短銀兩延不完繳卽著併案嚴追以重庫款○辛未雲南提督黃武賢休致仍賞食全俸○諭卞寶第奏拿獲謀殺人犯正法一摺據稱本年三月間訪聞武陵縣屋瓦壩地方有外來會匪陰謀爲逆結黨甚衆當卽知照署提督李勝派撥將弁會同該府縣上緊查拿旋據該縣知縣及提標弁兵馳往該處起有偽示暨刀矛火藥拿獲要匪鍾業章李發兒周旺生周家銀等正法並據都司申大發將首犯龍老九拿獲解省供稱與周旺生楊金幅鍾業章周銀亭趙美畫匠並梁么兒李光燮等糾合黨與多人約期起事已於訊供後將該犯卽行正法等語匪徒聚衆謀逆實屬罪不容誅業經先後殲除辦理尙爲迅速逸犯楊金幅等仍著飭屬一體嚴拿務獲究辦以淨根株出力之都司申大發著交部照例核給獎敘○壬申遣杭州副都統恭壽致祭禹陵○曾國荃奏江陰南岸黃山舊礮臺原設八十磅子克虜伯後膛銅礮四尊前因該處建築八百磅子極新洋式大礮明臺用將該四尊礮位拆下另擬於就近大石灣明臺八門左右添築四門以資安置祇因上年趕辦洋式大礮明臺工務紛繁未遑並及惟多安一礮卽多得一礮之用現在前項洋式礮臺大工將竣飭據統領明春武毅等營蘇松鎮總兵張景春勘估此次大石灣

添築礮臺四門工程若乘此接續興辦一氣呵成可期事半功倍所需工料經費格外力求撙節約共需銀一萬兩有奇又該營所儲一百二十磅田雞礮制作精良最爲設防利器惟須於江面設靶操演嫺熟臨事始益有把握並擬於大石灣一帶擇地建造礮房一所各築三合土垛牆一道將礮位妥爲安置以免不時挽運致易損壞約計亦需經費銀五百兩左右以上兩項經費將來均著於八百磅子洋式大礮明臺用款案內一併核銷以昭核實據籌防局司道詳請奏咨立案前來臣查所估經費甚屬撙節自應准其照辦以期江防益臻鞏固得旨該衙門知道○甲戌以馮子材爲雲南提督○謙禧奏前因漏網逆首楊步雲復在平泉州等處糾衆滋擾經奴才飛派駐防練兵前往會同各路官軍蒙員剿捕一面據情奏奉 硃批知道了卽著飭令派出員弁會同地方文武將首犯楊步雲及該匪黨悉數捕獲毋任漏網以靖地方欽此欽遵正在轉飭遵照間卽據管帶熱河練軍佐領全齡管帶古北口練軍參將張錫祿稟送中途搜獲楊步雲派探匪目李殿沅卽李三缺牙一名解經奴才督率理刑司員提訊該犯供認在楊步雲夥內分充頭目隨同各處搶劫現在楊步雲聞官兵衆多率衆赴撒拉巴營子邀添夥黨再行拒敵令伊先來查探等情屬實當經照章卽行就地正法一面嚴定賞罰通飭地方文武各員合力兜拿楊步雲務獲毋再任令漏網去後茲據佐領全齡參將張錫祿八溝參將春福先後稟稱探得逆首楊步雲

現在糾添夥黨二百餘人在撒拉巴營子盤踞並於該處路口設立礮臺以備抗拒全齡春福張錫祿等
帥督帶兵官練軍嚴整隊伍前往剿捕閏四月二十七日行至撒拉巴營子查看該處四面皆山地極險
要設立礮臺守甚嚴密正欲整隊深入忽聞礮臺火礮齊發賊匪蜂擁而出膽敢依山列陣抗拒施放鎗
礮勢甚猖獗我兵不能仰攻佐領全齡飭弁帶兵分路進攻自引勁旅奪路繞出賊後張錫祿亦飭哨官
馮履富等直擊中堅哨長岳魁龍與各路官軍蒙弁分作東西兩翼四面夾攻鎗礮齊施賊腹背受敵猶
復拚命死拒忽礮火延燃賊巢火燄猛烈賊陣驚動我軍勇氣百倍鼓勵前隊奮往直前鎗刀並進該逆
等勢不能支紛紛逃竄官軍督隊追逐各匪紛紛逃逸計鎗斃逆匪十餘名陣亡三十餘名被傷者不計
其數搜擒逆目一名逆匪九名奪獲火礮十餘桿馬匹器械衣服無算共燬賊巢二十餘座馬棚七八間
刨平礮臺一座因查楊步雲逃逸無獲先將獲犯就近解交平泉署看守全齡等會同官兵蒙弁等到處
搜捕至五月初二日訪知楊步雲在平泉州屬之老虎溝盤踞是日全齡督隊同各路官兵由該處東北
進捕張錫祿飭派弁兵同蒙弁等中西南兜拿該逆猝被圍捕倉皇失措猶敢騎馬放鎗抗拒左右衝突
經哨長壽祥等趕往首先擒獲各等情稟報並由佐領全齡飭派防禦福勒敦將逆首楊步雲夥匪李才
萬川輪賈城得馬幅周振詳陳富堂楊林李幅卽三沒牙張景和李鳳林押解前來當經奴才卷查光緒